

Chanzo cha Huruma na Rehema

Kiti chako cha enzi, Mungu, ni cha milele na milele; Fimbo ya ufalme wako ni fimbo ya adili. Zaburi 45:6.

Ingawa sasa amepaa kwenda mbele za uso wa Mungu na anakishiriki kiti cha enzi cha ulimwengu, Yesu hajapoteza hata kidogo ile tabia Yake ya huruma. Leo, moyo ule ule mwororo, wenye kuhurumia uko tayari kupokea huzuni zote za wanadamu. Leo mkono ule uliotobolewa umenyoshwa ili kuwapa baraka tele watu Wake walio ulimwenguni....

Katika majaribio yetu yote tunaye Msaidizi asiyeshindwa kamwe. Hatuachi peke yetu kupambana na majaribu, kupigana vita na uovu na hatimaye kupondwa pondwa na mizigo na huzuni. Ingawa sasa amefichwa asiweze kuonekana na macho ya wanadamu, sikio la imani linaweza kusikia sauti Yake ikisema, Usiogope; Mimi niko pamoja nawe. "Mimi ndiye aliye hai nami nalikuwa nimekufu na tazama, ni hai hata milele na milele" (Ufunuo 1:18).

Wale wanaoondoa uovu mioyoni mwao na kunyoosha mikono yao kwa sala ya dhati kwa Mungu watapata msaada ule ambao Mungu peke Yake ndiye anayeweza kuwapa. Fidia imekwisha kulipwa kwa ajili ya roho za wanadamu, ili waweze kuwa na fursa ya kuokoka kutoka katika utumwa wa dhambi na kupata msamaha, usafi na mbingu. ... Wale wanaokiendea kiti cha neema mara kwa mara, wakitoa maombi ya dhati na ya bidii kwa ajili ya kupewa hekima na nguvu ya Mungu, hawatashindwa kuwa watumishi wa Kristo wenye bidii na wanaofaa. Inawezekana wasiwe na vipaji vikubwa, lakini kwa unyenyekevu wa moyo na utegemezi thabiti kwa Yesu wanaweza kufanya kazi nzuri katika kuleta roho kwa Kristo....

Watu elfu elfu wanadhana potofu juu ya Mungu na sifa Zake. ... Mungu ni Mungu wa ukweli. Haki na rehema ni sifa za kiti Chake cha enzi. Yeye ni Mungu wa upendo na huruma. Hivyo ndivyo anavyowakilishwa ndani ya Mwana Wake, aliye Mwokozi wetu. Yeye ni Mungu mwenye uvumilivu na ustahimilivu. Ikiwa nafsi kama huyo ndiye tunayemwabudu na ambaye tabia Yake tunajitahidi kuifanya iwe ndani yetu, basi tunamwabudu Mungu wa kweli.

Ikiwa tunamfuata Kristo, sifa Zake, tulizohesabiwa, hupanda mbele za Baba kama harufu nzuri. Neema za tabia ya Mwokozi wetu, zilizopandwa mioyoni mwetu, zitaeneza harufu nzuri ya thamani kubwa sana.